

東萊先生分門詩律武庫

東萊先生詩武庫目錄

東萊呂氏編于麗澤書院

卷第一

酒飲門

以醉爲鄉

白墮春醪

麴生風味

濁酒一杯

忍斷杯中物

中山千日酒

甬上臍下

典衣償酒債

一飲一石

玉山頽

願爲十日飲

騎馬如乘船

枕麴藉糟

浮以大勺

耽酒無錢

酒兵

送客留髭

酒中聖賢

詩酒仙

金貂換酒

杖頭錢

黃雞白日

盜飲

盃酌餘瀝

瑞露甘香

卷第二

酒飲門

杯中弩影

步兵校尉

黃公酒壚

無事飲

醉鄉侯

三爵

醇酎九醞

堯飲千鍾

以駭俗態

拍浮酒船

桑落河酒

淵明攢眉

惡客

日飲無何

倒著接羅

酒客法士

公在壑谷

藍尾

漉巾

獨酌

醉面

酒家仙

公卷第三

儉約門

爛蒸瓠壺

拙於生事

數米而炊

得米如珠

家具少於車

一錢看囊

方冬猶葛衣

腰垂破銀章

坐以破馬韉

牆頭度酒

庾郎食韭

清畏人知

貧猶有一劒

名譽門

小大馮君

康成書帶

玉人

紫髯將軍

峴山

濯濯如春柳

束之高閣

人門兼美

皮裏陽秋

韋趙杞梓

東南之美

墓題征西

戶外之屨

水鏡

鶴在雞羣

角立傑出

卷第四

才能門

痛飲讀離騷

瑤林瓊樹

望郎

去天尺五

屈公望此府

行秘書

魏公畫籌

樗木散材

技癢欲言

識鑒門

卿家癡叔

其顙似堯

平生馬少遊

不如一縫掖

目擊道存

半面之雅

銅駝荆棘中

弊簞千金

相去九牛毛

掩口盧胡

烹瓠葉

阿奴碌碌

造物拘拘

通德擁髻

絳帕蒙頭

○卷第五

識鑒門

白屋非久留

軒冕儻來

臧穀均亡羊

何詎不爲福

折衝樽俎

鹽車遭伯樂

作駒已權奇

溝中枯木

恩德門

陰德附

直指一困

祭竈請比鄰

痿人念起

分我餘光

贖老馬

雞犬識新豐

助給薪水

陰德畏人知

治獄多陰德

案法平允

陰施陽報

書畫門

咄咄逼人

臨池盡墨

厭家雞愛野鶩

春蚓秋蛇

柳家元和脚

卷第六

書畫門

羣鴻戲海

一臺二妙

婉若銀鈎

妙畫通靈

裴楷三毛

宜置品壑中

正在阿堵中

二龍飛去

奏樂圖

此君墨君

通神佳手

名下無虛

咫尺萬里

畫魚得獺

雌雄龍

雲漢北風圖

天皇寺仲尼像

畫龍作雨

技藝門

懷中方書

疾在腠理

仙方出龍宮

身事問潁陽

紫金丹

燕頷虎頭

屠龍之技

伏犀貫枕

相在怒中

折臂三公

夢吞三畫

書板索金

門前水西流

卷第七

寶器門

歐冶五斂

劍有雌雄

干將鏌鋁

步光

修月斧

朱絲繩玉壺冰

玉燕釵

玉有辟邪香

補天石

支機石

支牀龜

珍產門

追風月題

乘黃

龍文虎脊

穆王八駿

德宗二馬

九花虬

汗血

卷第八

決雲兒

青田鶴

鳳將九雛

倒挂子

冰蚕

長腰米

青精飴

貢茶十品

紅藥

合浦珠還

靈異門

君子化猿鶴

蛇蟠鏡中

庭松西指

甕中畫像

啖棗悟前生

俗緣勿相近

老人青藜杖

天津老人

白鹿當道

○卷第九

花月之妖

卓錫飛鶴

深根固蒂

烏府

沙苑飛鶴

穴蟻難逃

燃犀見水族

樹化青牛

花木之妖

燭妖

卿雲

佳氣鬱蔥蔥

南柯夢

邯鄲枕

遊仙枕

精魂爲芝

王喬玉棺

胡廣托姓

鴻漸卜姓

天地劫灰

韓湘染花

左慈拄杖

颶風

三耳秀才

作勞耳鳴

○卷第十

雷而門

祈雨附

阿香推雷車

借霹靂車

馬上天瓢

隨車雨

御史雨

葬骸澍雨

段文昌

自暴析雨

瑞雷

鞭石

崖山

鄧國張公

房玄齡

蜴蜥

鏡鼻龍

玉龍子

甲子雨

李清臣

蘇子瞻

○卷第十一

佳人門

邢尹二夫人

時世粧

細馬駝吳姬

懶髓醫玉頰

解語花

林下風氣

駿馬換傾城

唾碧成花

金釵十二行

莫惜金縷衣

玉纖纖

傾城

墨池雪嶺

脉溫腸已斷

溫柔鄉

不如倚市門

人疑

夢龍據冑

號國夫人

海棠花睡

白髮青裙

○卷第十二

挂笏望西山

平生無長物

支離其形

徐公通介

眼前無俗物

蛙鳴當鼓吹

鵬鷄均一適

造化小兒

幼輿折齒

麻姑送酒

南面王樂

頭脂足垢

乞食歌姬院

陶潛乘籃輿

方外司馬

柳生左肘

我醉欲眠

落落無所容

心無天遊

漁童樵青

嚴陵瀨

○卷第十三

感慨門

短髮不勝簪

日月不相饒

過客逆旅

太白配殘月

宋玉賦招魂

思舊因鄰笛

丹塗一布衣

杜牧來遲

沈郎清瘦

雍門琴

劉郎再來

黃鵠歸故鄉

牛斗不神

望洋而嘆

憂患萬端

擊唾壺

淚河注海

不忘故物

老牛舐犢

望雲哭友

蒲柳之質

人生如寄

姓名爲鬼錄

歲在龍蛇

巋然如魯靈光

毅豹均死

不過西州門

羈旅

卷第十四

感慨門

莊舄思越

海變桑田

扣角而歌

麥秀之歌

幾居其半

膏火相煎

紅顏一春樹

半死心

我輩情鐘

桑榆無遠照

秋燕如客

窮猿失木

捋伊之鬚

敬言懼門

驪龍之珠

杞國天崩

見月而喘

睡觸屏風

鼓角鳴地中

心膽破裂

髀裏肉生

千里井

橫被口語

人馬辟易

肉瘦怯豺狼

險劇褻斜

傳舍

引錐刺舌

○卷第十五

賢豪門

文武兼備

栢溫有客

緩急扣門

張公江海客

啖公八百里

豪氣不除

古人中求

山澤臞仙

舌耕

萬頃陂

捫蝨而對

山西三明

一坐盡傾

鄭公鄉

窮愁著書

濁世佳公子

咄嗟而辦

德公上冢

數百万一擲

不辨袁安道

龍章鳳姿

老子猶龍

魯國真男子

才疎意廣

鼻息雷鳴

亶亶逼人

梁公拜床下

床下拜龐公

富貴取功名

怒髮衝冠

白虹貫日

一言取宰相

東萊先生分門詩武庫目錄終

東萊先生詩律武庫後集卷第一

呂氏家塾手編

○酒飲門

以醉爲鄉

唐王績字無功自號東臯子乘牛車經酒肆留飲
或數日嘗采杜康儀狄以來善酒者爲譜李淳風
曰君酒家南薰也所居東南有盤石乃立杜康祠
尊爲師以焦華配作醉鄉記以擬劉伶酒德頌故
坡詩有老來專以醉爲鄉之句因醉鄉記而言耳

白墮春醪

張君房脞說海東劉白墮善釀酒曝於日中經旬

酒味不動飲之者醉而不醒永熙中青州毛鴻賓
齎酒之番路逢劫盜飲之即醉皆被擒因號爲擒
姦酒故當時遊俠語曰不畏張弓拔刀惟畏白墮
春醪東坡次趙德麟餉酒詩云偶逢白墮爭春手
遣入王孫玉笋飛是也

麴生風味

鄭榮開元傳信記云葉法善有道術一日與朝士
數人會玄真觀忽有人叩門自稱麴生未及延接
已突入年少秀美語言不凡葉疑其非人潛飛小
劍擊之應手墮地乃一酒榼中有美醪衆共飲之
皆曰麴生風味不可忘也故後人相傳以酒云

濁酒一杯

晉嵇康嘗云今欲守陋巷教養子孫時與親故叙離闊陳說平生濁酒一杯彈琴一曲則吾之志意畢矣故杜公詩濁醪有妙理庶用慰沉浮即此意也

忍斷杯中物

晉吳術好飲因醉詬權貴遂戒飲阮宣一日命術飲術辭以斷飲宣以拳歐其背曰看看老逼疑漢忍斷杯中物耶抑而飲之故杜公有忍斷杯中物之句全用此也

中山千日酒

中山有千日酒飲之輒昏醉博物志載劉玄石飲

千日酒歸醉不醒其家以醉死葬之與同飲者聞之往諭焉至期開冢果醒故范傳正作李白墓銘云至今尚疑其醉在千日蓋此事耳

鬲上臍下

桓溫有主簿善別酒好者目爲青州從事惡者爲平原督郵蓋青州有齊部而平原有葦縣人言酒美則直止臍下酒惡止於鬲上住故從事謂到臍下督郵謂到鬲上皆借言之故東坡謝人惠酒有青州老從事鬲上非所部又人以雙樽相惠及開一樽無有有詩云不謂青州兩從事化爲烏有一先生皆用此也

典衣償酒債

吳孫權之叔濟嗜酒不治產業嘗醉欠人酒緡人皆笑之濟怡然自若謂曰尋常行坐處欠人酒債欲貨此緡袍以償之耳故古詩云典盡春衣無可柰尋常行處欠人錢杜公亦有酒債尋常行處有之句秦少游亦有詩云日典春衣非爲酒家貧食粥已多時皆此事也

一飲一石

晉劉伶嘗求酒於妻女捐酒毀器諫曰君酒太過非攝生之道宜斷之伶曰善不能自禁唯當具酒食祝鬼神自誓乃可妻從之伶跪祝曰天生劉伶

以酒爲名一飲一石五斗解醒婦兒之言慎不可
聽仍引酒食肉頽然復醉

玉山頽

晉嵇康飲酒醉倒如玉山之將頽故唐劉禹錫詩
云寂寂獨看金燼落紛紛只見玉山頽自知不是
高陽侶一夜星星騎馬迴玉人知爲玉山頽蓋用此也
云不肯星星騎馬迴玉人知爲玉山頽蓋用此也

願爲十日飲

史記秦昭王遺趙平原君書曰寡人間君之高義
願與君爲布衣交幸過我寡人當與君爲十日之
飲故坡詩有樂哉十日飲之句

騎馬如乘船

晉阮咸醉騎馬欹傾時人指而笑曰箇老子騎馬如乘船行波浪中故杜公飲中八仙歌云知章騎馬似乘船蓋本此也

枕麴藉糟

晉劉伶酒德頌有云先生於是方捧罍承槽銜盃漱醪奮髯箕踞枕麴藉糟故東坡題醉眠枕云枕麴先生猶笑汝枉將空腹貯遺編是也

浮以太白

說苑魏文侯與大夫飲使公乘不仁爲觴政曰飲不盡者浮以太白文侯飲不盡不仁舉白以浮君

故東坡贈萃老詩云若對青山談世事當須舉白
便浮君是也即今之罰酒耳

耽酒無錢

唐盧仝自號玉川子詩云天下薄夫苦耽酒玉川先
生也耽酒薄夫有錢恣悵樂先生無錢養淡薄有
錢無錢俱可憐百年驟過如流川東坡尋春詩云
玉川先生真可憐一生耽酒終無錢病過春光九
十日獨抱添丁看花發是也

酒兵

南史江諮嘗言酒猶兵也兵可千日不用不可一
日不備酒可千日不飲不可一飲不醉故後人遂

以酒爲兵東坡有破恨懸知酒有兵之句

送客留髡

史記齊威王置酒後宮召淳于髡賜之酒問曰先生能飲幾何而醉對曰臣飲一斗亦醉一石亦醉王曰先生飲一斗而醉安能飲一石哉髡曰賜酒大王之前執法在旁御史在後髡恐懼俯伏而飲不過一斗徑醉若乃履舄交錯杯盤狼藉堂上燭滅主人留髡而送客當此之時髡心最懽能飲一石故坡詩云縱使先生能一石主人未肯獨留髡

酒中聖賢

魏志徐邈爲尚書郎時禁酒而邈私醉從事趙逢

問以曹事邈曰中聖人逢白之太祖太祖怒鮮于
輔因進曰平日醉客謂酒清者爲聖人濁者爲賢
人邈性修謹偶醉狂言尔竟亦坐免至文帝時爲
中郎將所在稱職帝因問曰頗復中聖人否對曰
昔子反斃御叔罰臣嗜同二子而不能自懲時復
中之然宿瘤以醜見傳臣以醉見識帝笑曰名不
虛立遂遷撫軍帥杜公詩云坐對賢人酒東坡詩
云時復中之徐邈聖又云徐邈狂言孟德疑

詩酒仙

白樂天吳郡詩石記云貞元中韋應物爲蘇州牧
房孺復爲杭州牧韋嗜詩房嗜酒吳中目爲詩酒仙

金貂換酒

晉阮孚字遙集遷黃門侍郎散騎常侍嘗以金貂換酒爲所司彈劾帝宥之故杜公有金魚換酒來之句李太白亦有詩云不怕道狂揮玉爵亦曾乘興換金貂又云欲將朱匣青銅鏡換取金尊白玉卮鏡裏老來無避處尊前愁至有消時倣此事也

杖頭錢

晉阮脩字宣子性簡任不修人事常步行以百錢挂杖頭至酒店便獨酣暢雖當世富貴而不肯顧家無儋石之儲晏如也故後人有幸有金貂堪換酒不須宣子杖頭錢之句

黃雞白日

唐白樂天爲蘇杭守日嘗作醉歌云歌罷胡琴掩
秦瑟玲瓏再拜歌應畢誰道使君不解歌聽唱黃
雞與白日黃雞催曉丑時鳴白日催年酉時沒腰
間紅綬挂未穩鏡裏紅顏看已失玲瓏玲瓏老柰
何使君歌了汝更歌故東坡和蘇伯固九日詩云
只有黃雞與白日玲瓏應識使君歌此也

盜飲

晉畢卓少放達爲吏部郎常飲酒廢職比舍郎釀
熟卓因醉夜至其甕間盜飲爲掌酒者所縛明日
視之乃畢吏部也遽釋其縛卓遂引主人宴於甕

側致醉而去故東坡謝人惠酒詩有畢卓盜竊劉伶顛之句此也

盃酌餘瀝

晉書陸納謂桓溫曰明公近云飲酒三升納正可一升今有斗以備盃酌餘瀝故坡詩有帝觴分餘瀝之句用此也

瑞露甘香

纂異記載田畹鄧韶忽逢二書生謂曰我有瑞露之酒釀於百花之中與田鄧飲其味甘香故東坡地黃詩借此云嚙作瑞露珍又食荔枝詩云瑞露酌天漿

東萊先生詩律武庫後集卷第一

東萊先生詩律武庫後集卷第二

○酒飲門

杯中弩影

風俗通云汲縣令應郴以夏至日請主簿杜宣飲北壁上有懸赤弩照於杯中如蛇宣惡之及飲得疾郴知之復延宣飲於舊處其見如初因指謂曰此但弩影耳宣疾遂愈故杜詩有疑感樽中弩之句此事與樂廣蛇影大相類但弓與弩異耳

步兵校尉

晉阮籍本有濟世之心屬魏晉多故之際名士少有全者由是不與世事遂酣飲爲常聞步兵廚人

善釀有貯酒三百斛者乃求爲步兵校尉世號阮
步兵故坡詩有步兵飲酒中散琴之句嵇康爲中
散大夫著琴賦以彈琴詠詩自足於懷與藉善時
號嵇阮故云

黃公酒壚

晉王戎字濬冲爲尚書令著公服乘輅經黃公酒
壚下過顧謂後車客曰吾昔與嵇叔夜阮嗣宗暢
酣於此竹林之遊亦預其末自嵇阮之亡吾便爲
時所羈縲今日視之雖近邈若山河故坡寄王宣
義詩云不學山王乘駟馬回頭空指黃公壚是也
竹林七賢後獨山濤王戎仕宦顯達故云

無事飲

史記陳軫嘗謂犀首曰公何好飲答曰無事也故坡詩云犀首正緣無事飲是也

醉鄉侯

唐人詩云若使劉伶爲酒帝亦須封我醉鄉侯皮日休詩亦云他年謁帝言何事請贖劉伶作醉侯故後人常用其語

三爵

魏文帝典論言劉荊州表貴驕好酒自爲三爵大曰伯雅受七升次曰仲雅受五升又次曰季雅受三升故後人詩云勸君伯雅十分酒是也

醇酎九醞

西京雜記漢制宗廟八月飲酎以正月旦作至八月成名曰酎一曰九醞一曰醇酎謝惠連雪賦有酌湘吳之醇酎而杜公詩亦有性亦嗜醇酎之句

堯飲千鍾

孔叢子曰平原君與子高飲強子高酒曰昔有遺諺堯飲千鍾孔子百觚子路嗑々古之賢聖無不能飲子何辭焉

以駟俗態

昔王子晉有弟子號太陽好酒常醉人或問之對曰晚學俗態未除故藉酒以自駟耳

拍浮酒船

晉畢卓嘗謂人曰得酒滿數百斛船四時甘果美味置兩頭左手持酒盃右手持蟹螯拍浮酒船中便足了一生矣故東坡有詩云萬斛船中著美酒與君一生長拍浮是也

桑落河酒

世說桑落河多美酒晉宣帝時羌人來獻帝以九日賜百寮飲故庾信嘗從蒲州史君乞酒詩云蒲城桑落酒灞岸菊花天而杜詩亦云坐聞桑落酒來把菊花枝皆用此也

淵明攢眉

廬阜記遠公法師結白蓮淨土之社謂淵明趣尚
高邁以書召之淵明曰弟子性嗜酒法師若許飲
即往矣遠許之遂造焉遠因勉入社淵明攢眉而
去時謝靈運求入社而師以其心雜止之時人有
淵明使不留靈運推不去之語

惡客

唐元結謂不飲者爲惡客故東坡在黃州而陳季
常時復遠來相訪故寄詩云三年已四至歲歲逢
惡客黃山谷招客解醒絕句云破卯扶頭酒一盃
燈前風味喚仍回高陽社裏如相訪不用閑攜惡
客來言不飲者不必至又後人以痛飲爲惡客

日飲無何

漢表盎字絲爲吳相其兄子種謂盎曰吳王驕日久今絲欲刻治之彼不上書告君則利劍刺君矣惟能日飲無何說王無反如此則幸脫無事矣盎納其言故坡詩有日飲無何足表盎之句

倒著接離

世說白接離衫也一云白帽也晉山簡字季倫爲襄陽守嘗醉習家高陽池襄陽小兒歌曰山公出何許往造高陽池日暮倒載歸酩酊無所知時不能騎馬倒著白接離舉鞭問葛強何如并州兒而李太白作襄陽歌云落日欲沒峴山西倒著接離

花下迷襄陽小兒齊拍手隔堦爭唱白銅鞮旁人
借問笑何事笑殺山公醉似泥故東坡同李公擇
飲傳國博家詩有兒童拍手鬧黃昏應笑山公醉
習園借用也

酒客法士

揚雄作酒箴以諷成帝其文以酒客難法度之士
云譬言之於物子猶餅矣觀餅之居居井之湄處高
臨深動常近危陳遵見之大喜謂張竦曰吾與尔
猶是也足下諷誦經書苦心自約不敢差跌而我
放意目恣浮沉俗間官爵功名不減於子而差樂
顧不優耶竦曰子欲爲我亦不能吾而效子亦敗

矣故坡和孔常父戲飲詩云揚雄他文不皆奇獨
稱觀餅居井湄酒客法士兩小兒陳遵張竦曾何
知全用此事也

公在壑谷

左傳鄭伯有嗜酒爲窟室而夜飲朝至未已朝者
曰公焉在其人曰吾公在壑谷故坡夜飲詩云月
未上時應早散免教壑谷問吾公是也

藍尾

太平廣記虎部申屠龍曰婪尾酒最後飲也元日
飲酒自少至長蓋祝壽之意年最高者飲藍尾杯
衆勸三杯喜其壽之高也藍尾猶吳越人稱臨尾

蓋鄉語也白樂天詩備矣樂天元日贈夢得云與
君同甲子歲酒合誰先而劉禹錫元日樂天見過
因舉酒爲賀云與君同甲子壽酒讓先杯而樂天
又有歲假內命酒贈周判蕭協律云共知欲老流
年急且喜新正假日頻聞健此時相勸醉偷閑何
處共尋春脚隨周叟行猶疾頭比蕭翁白未勻歲
酒先拈辭不得被君推作少年人又歲日家宴戲
示弟姪云歲盡後推藍尾酒春盤先勸膠牙
錫又元日對酒三杯藍尾酒一榼膠牙錫除却崔
常侍無人與我爭又喜入新年老過占他藍尾酒
病餘收得到頭身

漉巾

晉陶潛嗜酒郡將常候之值其釀熟取頭上葛巾漉畢還復著之後人有寄言彭澤令何必漉烏巾之句蓋以此也

獨酌

唐馬周入關西舍新豐逆旅命酒一斗八升悠然獨酌又李白月下獨酌云花下一壺酒獨酌無相親舉杯邀明月對影成三人月既不解飲影徒隨我身我歌月徘徊我舞影凌亂醒時同交歡醉後各分散永結無情遊相期綠岳畔

醉面

馬子才浩齋歌請君醉我一斗酒紅光入面春風
和故後人有醉面覺陽春之句杜詩亦云顏衰酒
借紅一意也

酒家仙

杜子美飲中八仙歌李白一斗詩百篇長安市上
酒家眠天子呼來不上船自稱臣是酒家仙故後
人有自作酒家仙之句

東萊先生詩律武庫後集卷第二

東萊先生詩律武庫後集卷第三

○儉約門

爛蒸瓠壺

唐盧懷謹爲相清儉召客食曰爛蒸去毛莫拗折
項客疑其鵝鴨也已而下粟米飯一盂蒸葫蘆一
枚而已坡詩爛蒸鵝鴨乃瓠壺又蜀志張府君齋
如瓠壺外雖澤而中實鹿麕耳

拙於生事

唐顏真卿爲刑部尚書時乞米於李大夫帖云拙
於生事家食粥來已數月今又罄乏實用憂煎故
坡詩顏公食粥敢言炊又秦少游云家貧食粥已

多時用此事也

數米而炊

莊周言簡髮而櫛數米而炊切切乎又何足以濟
世哉故坡詩有陋邦貧且病數米銖稱炭之句又
漢末天下兵荒米斗直十餘緡京房持一衾於長
安中換塵米一斗故杜公秋雨嘆云城中斗米換
衾裯相許寧論兩相直

得米如珠

說苑墨子謂骨贅曰今凶年有欲與子以隨侯之
珠又願與子以一鍾之粟者得粟不得珠得珠不
得粟子將何擇焉故坡詩有得米如得珠之句

家具少於車

歐陽公詩話云孟郊賈島皆以詩窮至死而平生尤喜爲窮苦之句孟有移居詩云借車載家具家具少於車由是觀之乃知都無一物尔故坡詩云君不見詩人載車無可載蓋此也

一錢看囊

晉阮孚山野自放嗜酒日挑一阜囊遊會稽客問囊中何物孚曰俱無物但一錢看囊庶免羞澁爾故杜子美詩云囊空恐羞澁留得一錢看

方冬猶葛衣

隋袁充少時父黨過門見充方冬尚葛衣因戲之

曰絺兮綌兮淒其以風充曰爲絺爲綌服之無數
故杜詩云北里富熏天高枕夜吹笛焉知南鄰翁
九月猶絺綌是也

腰垂破銀章

隋張嵩清儉守節爲巴西令宮滿駕柴車載書數
百卷腰垂破銀章辭邑人而去邑人惜其去懇留
於文帝遂遷爲巴西太守杜詩有素髮乾垂領銀
章破在腰之句

坐以破馬韉

戰國策蘇秦少與張儀善秦旣在趙爲相儀至趙
使人白秦秦惡其來必欲激怒使去之故令儀於

城東門外坐以破馬韉進以糲食儀憤乃西入秦
昭王喜之拜爲相儀歎曰馬韉之事乃至是乎老
杜詩云人來坐馬韉言貧無坐席也

墻頭度酒

晉陶侃少時家貧有友人見訪無以致誠其鄰人
頗賢謂侃曰子門有長者軒車何不延之以論當
世事侃曰貧不能備酒醴鄰人密於墻頭度以濁
酒隻雞遂成終日之樂本朝王冀公欽若過其廟
題詩云九重天闕夢掉臂黃雞白酒鄰舍恩而杜
公夏日李公見訪詩云借問有酒否墻頭過濁醪
皆用此事也

庾郎食韭

南史庾杲之清貧自鄴食惟有韭菹淪韭生韭雜菜任昉常戲之曰誰謂庾郎貧食鮭常有二十七種菜蓋戲言其有三韭也故坡詩有筒中錢盡案無鮭之句是也

清畏人知

晉胡質有清德武帝問其子威曰卿清何如父清威曰臣父清畏人知臣清畏人不知故東坡有丈人清德畏人知之句

貧猶有一劍

史記馮驩躡孺見孟嘗君君置傳舍中十餘日君

問傳舍長曰客何所爲曰馮先生甚貧猶有一劍
故後人有先生有劍未爲貧之句

○名譽門

大小馮君

前漢馮奉世有五子曰譚曰野王曰遂曰立曰參
皆有名譽而野王與立相代上郡太守吏民歌之
曰大馮君小馮君兄弟繼踵相因循聰明慈愛惠
利民政如魯衛德化均周公康叔猶二君故坡詩
有今年太守尤難繼慈愛聰明惠利人之句

康成書帶

三齊記鄭司農常居不其城南山教授所居山下

草如薤葉長尺餘時人名爲康成書帶故坡書軒
詩云庭下已生書帶草使君疑是鄭康成是也

玉人

晉衛玠字叔寶風神秀異每乘羊車入市見者皆
以爲玉人玠舅王濟俊爽有風姿每見玠輒嘆曰
珠玉在側覺我形穢又曰與之同遊夔若明珠之
在側朗然照人又裴楷字叔則風神高邁容儀俊
爽時謂之玉人又曰一見裴叔則如近玉山相照
映也故後人有敢近玉人遊之句

紫髯將軍

孫權爲張遼所敗遼問降人曰向有些紫髯將軍爲

誰答曰孫會稽也故坡有受降城下紫髯郎之句

峴山

晉羊祜叔子鎮襄陽嘗登峴山慨然嘆息顧謂從事鄒湛曰自有宇宙便有此山由來賢達勝士登此遠望如我與卿者多矣今皆湮沒無聞使人悲傷湛對曰公德冠四海道嗣前哲今問令望與此山俱傳至如湛輩當如公言耳故坡登峴山亭詩云我非羊叔子愧此峴山亭是也

濯濯如春柳

晉王恭美姿儀人多慕悅或目云如濯濯春月柳也又嘗於雪中披鶴氅而行孟昶見之曰真神仙

中人也故東坡詩云更著綸巾披鶴氅他年應作
畫圖誇昔諸葛亮羽扇綸巾旨麾三軍

東之高閣

晉庾翼傳京兆杜乂陳郡殷浩並才名冠世翼弗
之重每語人曰此輩宜東之高閣俟天下太平然
後議其任耳故韓退之借其言作詩云春秋三傳
束高閣獨抱遺經究始終

人門兼美

陳書高宗謂蔡凝曰我欲用義興主婿錢肅爲黃
門郎卿意如何凝曰黃散之職故須人門兼美又
唐史李揆肅宗謂曰卿門地人物文學皆爲當世

第一故東坡送歐公之子叔弼詩云清朝固多士
人門子皆冠是也

皮裏陽秋

晉褚裒字季野名冠中朝柏彞曰季野有皮裏陽
秋言外無藏否而內有褒貶也謝安亦云裒雖不
言而四時之氣亦備矣

韋趙杞梓

唐韋承慶兄弟與趙冬曦兄弟俱有盛名張說曰
韋趙兄弟人之杞梓也

東南之美

漢虞翻與孔融書并示以所著易注融答書云聞

延陵之觀樂觀吾子之治易乃知東南之美非徒
會稽之竹箭也

東南之美出爾雅

墓題征西

魏太祖曹操初爲典軍校尉意欲爲國家討賊立
功封侯作征西將軍使異時題其墓道曰漢故征
西將軍曹侯之墓乃吾志也故坡和荆公太一宮
壁詩云但有樽中若下何須墓上征西

若下酒名

戶外之屨

列子之齊中道而反遇伯昏瞀人曰奚方而反曰
吾驚焉吾嘗食於十漿而五漿先饋吾是以驚伯
昏瞀人曰善哉觀乎汝處已人將保汝矣無幾何

而戶外之屨滿矣

水鏡

晉樂廣衛玠使諸子造廣曰此人之水鏡見之瑩然若披雲霧而覩青天也

鶴在雞羣

晉嵇紹中散大夫康之子也紹始入洛或謂王戎曰昨見紹於稠人中昂昂如野鶴之在雞羣戎曰君復未見其父耳

角立傑出

漢陳蕃稱徐孺子生於江南卑薄之地而能角立傑出也

東萊先生詩律武庫後集卷第三

東萊先生詩律武庫後集卷第四

○才能門

痛飲讀離騷

世說王孝伯云名士不可無奇才然但常得無事痛飲讀離騷經便可爲名士耳故後人有詩云誰能無事讀離騷此也

瑶林瓊樹

晉王戎有人倫鑒識常目王衍如瑶林瓊樹自然是風塵表物故坡詩有故人年少真瓊樹之句

望郎

唐李義山酬令狐郎中詩有望郎臨古郡佳句洒

丹青之句而東坡用以送周正孺得梓州云東川
得望郎本此也

去天尺五

京兆城南有韋曲杜曲皆世遭盛時衣冠煒燦時
人語曰城南韋杜去天尺五言長安帝都相近也
故杜牧詩云家在城南韋杜旁即此耳

屈公望此府

唐皇甫公義檢校沛王府長史引韋思謙爲同
倉曹謂韋曰公豈此池中之物屈公爲數旬客以
望此府尔故東坡送人詩云留君望此府助我憐
其衰正此事耳

行祕書

唐國朝雜錄云唐太宗出幸有司請載書以從帝曰不須虞世南在此行祕書也故東坡題万卷堂云君家四壁如相如卷藏天祿吞石渠豈惟鄴侯三萬軸家有世南行祕書是也

魏公畫簫

晉魏舒爲鍾毓長史毓每與參佐射舒但爲畫簫而已後遇朋儔不足乃以舒滿數毓初不知其善射及是舒容範閑雅張弓挾矢發無不中舉坐皆驚莫有敵者毓愧嘆曰吾之不足以知卿才有如此射矣故東坡不知歐叔弼能詩及臨發出一篇

乃淵明風製因作詩送行云平生魏公筆忽斷郢人墁蓋此事也

樗木散材

莊子曰吾有大木人謂之樗曲輳櫟社其大蔽天匠石曰此散材也故老杜詩云鄭公樗散鬢成絲而東坡云嬾情便樗散踈狂托聖明亦是也

技癢欲言

應劭風俗通云太史公記高漸離變名姓爲人庸保匿作於宋民久之作苦聞其家堂上有客擊筑技癢不能無出言蓋懷其技而癢也故潘岳賦云徒心煩而技癢者此也

○識鑒門

卿家癡叔

晉王湛少言語初有隱德人莫能知兄弟宗族皆以爲癡兄子濟尤輕之无子姪之敬武帝亦常調濟曰卿家癡叔死未濟无以答一日詣湛見牀頭有周易問曰叔父何用此爲湛曰躰中不佳時復看耳濟請言之因剖析玄理皆所未聞武帝復如前問濟曰臣叔殊不癡因稱其美又濟有馬難乘湛因騎之姿容旣妙回策如縈雖善騎者无以過也湛曰此馬雖良不堪苦行近見督郵馬勝此但芻秣不至耳濟試養之與已馬等湛又曰此馬任

重方知之平路无以別也於是於蟻封內試之濟馬果躡而督郵馬如常濟始驚異謂其父曰濟得一叔耳故東坡和王晉卿畫馬詩云督郵有良馬不爲君所知一朝見縈策蟻封驚肉飛豈惟馬不遇人已半生癡是也肉飛見中山靖王曰羽翮肉飛故此有云

其顙似堯

家語孔子適鄭與弟子相失孔子獨立於鄭之東門鄭人或謂子貢曰東門有人其顙類堯其項類皋陶其肩似子產然自腰以不及禹三寸纍纍若喪家之狗子貢以告孔子欣然曰形狀末也而

似喪家狗然哉然哉故東坡從駕景靈宮詩有共驚堯顙類高辛之句蓋借用也

平生馬少遊

漢馬援嘗謂官屬曰吾從弟少遊嘗哀吾慷慨多大志曰士生一世但取衣食裁足乘下澤車馭款段馬爲郡縣吏守墳墓鄉里稱善人足矣何必復求盈餘但自苦耳吾當虜未滅上霧下潦毒氣薰蒸因念少遊平生時語何可得也今賴士大夫之力蒙被大恩猥先諸君紆佩金紫且喜且慙故坡詩有念歸意云雪堂亦有思歸曲爲謝平生馬少遊蓋取子由之言也

不如一縫掖

後漢王符隱居著書三十篇以譏當世得失號曰
潜夫論時皇甫規解官歸安定人有以貨得鴈門
守者亦去官還家書刺謁規卧不迎既入而問
卿在鴈門食鴈美乎頃又報云王符在門規素聞
其名乃遽起衣不及帶屣履迎門援符手而還與
同坐極歡時人語曰徒見二千石不如一縫掖言
書生道藝之貴也故坡詩有云歸來問鴈吾何敢
疾世王符解著書是也

目擊道存

莊子田子方篇仲尼見溫伯雪子而不言仲尼曰善

夫人者目擊而道存矣不可以容聲矣故杜詩有懷新目似擊接要心已領之句是也

半面之雅

後漢應奉曾見造車匠於門間半面他日於路逢而識之故後人以曾見者爲半面之雅

銅駝荆棘中

晉索靖有先識遠見知天下將亂指洛陽宮門銅駝嘆曰曾見汝在荆棘中矣未幾晉惠帝之末天下大亂故坡詩有豈信荆棘埋銅駝之句

弊簾千金

魏文帝論文曰夫人喜於自見而文非一軀鮮能

香四
五
備善是以各以所長相輕所短里語曰家有弊簞
享以千金斯不自見之患也故坡詩云千金弊簞
那堪換此也

相去九牛毛

有人或謂華譚曰諺言人之相去如九牛毛寧有
是理乎譚曰昔者許由巢父謔天子之貴市道小
人爭半錢之利此之相去奚啻九牛毛故坡題趙
清獻公高齋云乃知賢達與愚陋豈直相去九牛
毛蓋以此也

掩口盧胡

盧胡笑也漢應劭云昔鄭人以乾鼠爲璞宋愚夫

亦寶燕石緹繒十重夫觀之者掩口盧胡而笑坡
詩滿堂坐客皆盧胡

烹瓠葉

後漢劉昆教授弟子常五百餘人每春秋享射常
備列儀典以瓠葉爲俎豆原昆意蓋取小雅瓠葉
詩曰幡幡瓠葉采之烹之之意故坡有厭伴老儒
烹瓠葉強隨舉子踏槐花之句

阿奴碌碌

晉周顗伯仁之母李氏字絡秀當中興時顗嵩謨
兄弟並列顯位嘗冬至日李舉觴賜三子曰吾渡
江托足無所不謂汝等並貴列吾目前復何所憂

嵩起曰恐不如尊旨伯仁志大而才短名重而識
暗好乘人之弊此非自全之道而嵩性抗直亦不
容於世唯阿奴謨小字碌碌當在母目下後皆如
其言故坡寄弟子由詩有云阿奴須碌碌門戶要
全生以此也

造物拘拘

莊子子輿有病子杞往問之曰偉哉夫造物者將
以予爲此拘拘也曲僂發背上有五管願隱於臍
肩高於頂跣躄而鑒井曰嗟乎天又將以予爲此
拘拘也故坡維摩像詩云昔者子輿病且死其友
子杞往問之跣躄鑒井自嘆息造物將奚以我爲

蓋以此也

通德擁髻

漢伶玄字子干買妾樊通德有才色能言趙飛燕姊妹故事子干閑居命言之厭厭不倦子干謂通德曰斯人俱灰滅矣當時疲精殆力馳騫嗜慾蠱惑之事寧知終歸荒田野草乎通德卷袖顧視燭影以手擁髻淒然泣下不勝其悲坡贈朝雲詩有恰如通德伴伶玄之句又和王定國詩擁髻无言夜語清之句以定國有美妾故也

絳帕蒙頭

吳孫策字伯符江表傳曰策欲誅道士于吉諸將

勸之策曰昔南陽張津爲交州刺史捨前聖典籍
廢漢家法律嘗著絳帕頭鼓琴燒香讀邪俗道書
云以助化卒爲南夷所殺此輩甚無益諸君但未
悟耳故坡謫儋耳詩云從今免被孫郎笑絳帕蒙
頭讀道書是也

東萊先生詩律武庫後集卷第四